

四庫全書

集部

欽定四庫全書

集部
止齋集

目錄
卷一至三

詳校官庶吉士_臣龍廷祝

主事_臣呂雲棟覆勘

覆校官主事_臣李駿

校對官中書_臣范鏊

謄錄監生_臣劉璿

欽定四庫全書

集部四

止齋文集

別集類三宋

提要

臣等謹按止齋文集五十一卷宋陳傅良撰傳
良有春秋後傳已著錄此集凡詩九卷文四十
二卷其門人陳叔遠所編前後各有叔遠序
所取斷自乾道丁亥訖于嘉泰癸亥凡乾道
以前之少作盡削不存其去取特為精審末

為附錄一卷為樓鑰所作神道碑蔡幼學所作墓誌葉適所作行狀而又有雜文八篇綴于其後不知誰所續入據宏治乙丑王瓚序稱澤州張璉欲掇拾遺逸以為外集其璉重刊所附入歟自周行已傳程子之學永嘉遂自為一派而傅良及葉適尤其巨擘本傳稱永嘉鄭伯熊薛季宣皆以學行聞伯熊于古人經治法討論尤精傅良皆師事之而得

季宣之學為多及入太學與廣漢張棖東萊
呂祖謙友善祖謙為言本朝文獻相承而主
敬集義之功得於棖為多然傳良之學終以
通知成敗諳練掌故為長不專於坐談心性
故本傳又稱傳良為學自三代秦漢以下靡
不研究一事一物必稽於實而後已蓋記其
實也當寧宗即位之初朱子以趙汝愚薦內
召既汝愚與韓侂冑忤內批與朱子在外宮

觀傳良為中書舍人持不肯下其於朱子亦
不薄然葉紹翁四朝聞見錄稱考亭先生晚
註毛詩盡去序文以彤管為淫奔之具以城
闕為偷期之所止齋陳氏得其說而病之謂
以千七百年女史之彤管與三代之學校以
為淫奔之具偷期之所竊有所未安獨藏其
說不與考亭先生辨考亭微知其然嘗移書
求其詩說止齋答以公近與陸子靜互辨無

極又與陳同甫爭論王霸矣且某未嘗註詩
所以說詩者不過與平人為舉子講義今皆
毀棄之矣蓋不欲滋朱之辨也云云則傳良
雖與講學者游而不涉植黨之私曲相附和
亦不涉爭名之見顯立異同在宋儒之中可
稱篤實故集中多切於實用之文而密栗堅
峭自然高雅亦無南渡末流冗沓腐濫之氣
蓋有本之言固迥不同矣乾隆四十二年五

月恭校上

總纂官

臣紀昀

陸錫熊

孫士毅

總校官

臣

陸費墀

欽定四庫全書

集部四

止齋集目錄

別集類三 宋

卷一

歌辭

古詩一

卷二

古詩二

卷三

古詩三

卷四

古詩四

卷五

律詩一

卷六

律詩二

卷七

律詩三

卷八

律詩四

卷九

挽詩

卷十

內制

卷十一

外制一

卷十二

外制二

卷十三

外制三

卷十四

外制四

卷十五

外制五

卷十六

外制六

卷十七

外制七

卷十八

外制八

卷十九

奏狀劄子一

卷二十

奏狀劄子二

卷二十一

奏狀劄子三

卷二十二

奏狀劄子四

卷二十三

奏狀劄子五

卷二十四

奏狀劄子六

卷二十五

奏狀劄子七

卷二十六

奏狀劄子八

卷二十七

奏狀劄子九

卷二十八

講義故事

廟議附

卷二十九

廷對策

卷三十

表上

卷三十一

表下

卷三十二

啟上

卷三十三

啟中

卷三十四

啟下

卷三十五

手書一

卷三十六

手書二

卷三十七

手書三

卷三十八

手書四

卷三十九

記

卷四十

序

卷四十一

題跋上

卷四十二

題跋下

卷四十三

策問

卷四十四

雜著

卷四十五

祭文上

卷四十六

祭文下

卷四十七

誌銘一

卷四十八

誌銘二

卷四十九

誌銘三

卷五十

誌銘四

卷五十一

欽定四庫全書

目錄

行狀

卷五十二

雜文

附錄

止齋集原序

先生稟抱天穎研盡學力據六經奧會執九經百家之
轡俾環嚮以趨于一披剔文義躡藉衆糾究明帝王經
世宏模而放於秦漢以下治亂興衰之故獨揭源要不
牽多岐由是彰往考來默察當世丕平之機深抱大業
至於化裁推行不動聲色使人回心而嚮道者其綱領
條目靡不該具蓋嘗忘寢廢食審玩孰復庶幾對越天
地百世以俟後聖而不惑也雖言論未孚幾進輒沮而

志念回皇與物委蛇左推右挽旁接廣誘其任重道遠
終老未嘗一日敢忘於斯焉嗚呼盛矣鄒魯之統緒河
洛之承續千載以來不知其能幾見也執經戶外方屢
聞集片言落筆傳誦震響塲屋相師而紹興之文丕變
則肇於隆興之癸未屏居梅潭危坐覃思起詣絕軼學
成道尊則邃於乾道之丁亥博交遍驗洞礙融室對策
初第懇蓋獨到則盛於乾道之壬辰官太學倅閩府詆
劾却掃勤十寒暑紬繹文獻宏綱具舉則備於淳熙之

丁未起守桂監持節湖南疏滌拊摩民信有古百年之
思鬱乎湘山則驗於紹興之庚戌召對光宗驟遇獎用
侍立代言贊翊儲邸次第蘊畫庶將發揮則著於紹熙
之癸丑宛轉極諫徬徨乞身龍飛急召十旬乃罷爰抒
舊志著於訓傳疾疢漸臻梁木竟殞則終於嘉泰之癸
亥叔遠夙蒙挈策俾窺津涯蒿幹鷗羽惕負大賜適當
新義川漲群文蜩興疇昔愬析而致孤條之靡鬱砥途
之失榛乎是用敬輯遺稿寄諸琬琰儻開後哲庶弗淪

墜矧韋布眩慕影響徧傳或混幼作或雜真贗詭題叢
帙誕彌遐陬輪耀掩汚理合釐別故今裒次斷自梅潭
丁亥之後凡為歌辭古律詩內外制奏狀劄子表啓書
簡序記雜著祭文墓志行狀總五十一卷即先生燕坐
之齋以為集名若成書則有讀書譜二卷春秋後傳十
二卷左氏章指三十卷周禮進說三卷進讀藝祖皇帝
實錄一卷未脫稿則有詩訓義周漢以來兵制皇朝大
事記皇朝百官公卿拜罷譜皇朝財賦兵防秩官志彙

別自為編附識其目庸熄淆亂先生名傳良字君舉世
系歷官具見於神道碑墓志銘行狀云嘉定戊辰門人
承直郎太學博士曹叔遠謹序

儒者之所難曰德曰功曰言而已三者克具斯為儒者
之盛遠而有以恢弘魯鄒所傳之緒近而有以昭闡濂
洛未啟之機尚論其世有足徵者此止齋陳文節公所
以不可及也公少以斯文為己任強學篤志弗得弗舍
其從鄭景望薛季宣也以克己兢業為要其友張欽夫

呂伯恭也則交致夫持敬集義之功涵養於致知之際躬行於自得之餘剛毅樂易孝友恭肅融澈混成莫測涯涘是能立德者矣其教人也誘掖不倦四方景從士習丕變隨才有造其仕於外也事無細鉅一裁以義勸善革奸縮用溥利卓越之績傳不絕書其在朝也正色讜論直前極陳扶翊大政匡持君德欲進忠賢則黃冕仲朱元晦之遷改不與書行欲推權奸則率逢原張子仁陳源之除目繳駁論奏苟裨社稷奮不顧身是能立

功者矣讀書有譜六經有論建隆有編毛詩有解詁春秋有後傳左氏有章指周禮有進說制誥有集皇宋有大事記進讀有藝祖實錄周漢以來有兵制著書明道簡冊充棟是能立言者矣功在人德言在己三者相須以爲用者也瓚幸生公之鄉屢嘗誦讀遺文而私淑之茫乎如陰陽之闔闢也浩乎如河海之潤滴也燦乎如日星之炳耀也油乎如風雲之流行也雄偉而不放精深而不晦馳軼而不迫起伏欽縱愈出愈駛引古質今

滌冗為新錯綜萬務體悉人情而歸宿於至理蓋不獨繩矩之具而精粗隱顯皆可以適天下之用自有文字以來學士大夫竦企傾動固其時乎非有本者其孰能之公淹貫六經包括百氏洞徹天人之奧而於歷代經制大法與夫當世制度沿革失得之故稽驗鈎索委曲該洽此豈汎然雕飭以驚於虛言者也公文散載于羣書遐陬寡陋未見有統彙為全帙者瓚近於秘閣錄出公集五十二卷則向所嘗誦讀者百無一二存焉蓋曹

公所編止自梅潭丁亥之歲而他作不入也弘治乙丑
侍御史同年澤州張君伯純往巡浙中因論鄉哲而於
公尤致嚮慕瓚遂出示公集伯純喜曰璉求公文久矣
而莫獲見之是行未廣也請得梓之以傳且欲彙拾散
逸以為外集伯純積學善文風裁峻整在公若有宿契
焉者宜其樂公之制作行於時也瀕行屬瓚序于集後
瓚何人乃敢序公文哉况樓蔡水心諸公紀述備矣聊
撫立德立功立言之實以寓泰山喬嶽企仰之意然公

名高招忌行方取詆君眷未幾而輒沮道術畧伸而復
斥不肯少貶以從流俗而所謂立功者未能充滿其志
而國運寢以衰下矣可勝歎哉天佑斯文而使公之制
作復行於時固世教之所關也後學王瓚謹序

欽定四庫全書卷

止齋集卷一

宋 陳傅良 撰

歌辭

暮之春六章章五句

先生有堂曰暮春御翰扁榜

暮之春兮物維其嘉
乾際兮坤涯
母將雛兮彼實者華
魚在藻兮燕子還于故家
今者不樂兮云何

暮之春兮風日與柔
桑女兮南疇
相爾夏畦兮悲秋
斷冰兮長夜無裘
今者不樂兮何求

暮之春兮雍雍熙熙堯裳兮舜衣五絃之琴兮一夔曾
不知結繩與秉鉞兮何時瞻言千載兮忽焉其遠而

山有迤蒙兮水有沂天未喪斯文兮在茲二三子兮皇
皇欲何之鼓瑟兮為誰捨此兮吾將安歸

止齋兮年年室環堵兮兩山有川鷗鷺巢簷兮圓荷田
田豈無芳草兮杜鵑世微孔子兮獨抱乎韋編

雲漢之章兮光燭天朝宗兮列仙胡歸晚兮病骨拳然
與客歌商兮忘食與眠點爾何如兮吾未知其孰賢

西廟招辭

并序

淳熙十有三年二月知瑞安縣事公非先生之曾孫
劉龜從再作西廟以祠宣和縣令王公經國於其落
也邑人陳某為作迎神一章使工歌之經國字公濟
其守禦事許忠簡公嘗識之故不叙

君昔兮胡不去斯君今兮胡不來斯文棟兮凋楹峴山
之麓兮江圻旨酒牲兮潔肥皓遺老兮鬢眉坎擊鼓兮
吹簫君勿來兮遲遲山蜿蜒兮榕陰萋萋江水平夷兮

無蛟與螭君之來兮可以娛嬉君不共安兮誰與共危
鳴玉兮袞衣彼亦君兮一時葬中州兮為夷匪冢則廟
兮牛羊纍纍尚我民兮有知子子孫孫兮永依揆之兮
以是非君舍此兮安之田有畔兮澤有陂桑稻兮誕彌
懷不報兮忸怩日早暮兮夜何其猶容與兮誰湏

古詩

落葉一首別諸友客新昌

落葉一二數遙夜忽已午百年能幾何望道猶未睹清

揚得邂逅簡易從險阻明朝買扁舟萬議付風雨新詩
話別恨為我謝酸楚蒼蒼歲後竹白首見肺腑要有不
別時尸居一環堵

讀范文正公神道碑有感佚事

武侯不可致元德造其廬公在衰經中乃上時政書維
時君臣定事與草昧殊出處千載同豈必名迹如行伍
拔大將寒饑得名儒推轂天下士百年用其餘生平慕
河汾未許王魏俱慙慙八司馬意獨何區區自古朋黨

論消復莽無期誰令羣疑亡韓富及有為惜哉公不見
功名止西陲

送國子監丞顏幾聖提舉江東分韻得動字

長安夜未艾客枕厭羣動平明視天闕劍珮鳴琬琰學
省雖冷官上意嚮周孔六飛自天下多士溘雲涌饕餮
燕草鹿道義發醯蠓方將屬耆英高舉出埃壘離觴春
駘蕩歸路月朧朧勲業當及時千年付南董

懷寧國守鄭少卿景望

一日一度過短牆三日風雨撓我觴
天球河圖在東序保障繭絲分晉陽
我欲從之茗水遠搔首不見月滿廊
笑看兒女羅列拜老人星下燒夜香

送宋國博叅議江東分韻得夜字前年上幸學
一時同舍今去畧盡為之悵然

南門供帳江上亭北門觴酒湖邊榭
兩年出餞畧可數往往行人半同舍
憶昔翠華臨壁海儒先一日爭聲價
蘇君舌掉巫峽水楊君氣奪幽并夜
黃君石斫不可轉

夫子居然古彛尊艾軒風流天下少獨奏咸韶無蕩夏
黃梁未熟事如許白髮不生心亦怕古來賢俊多坎軻
道與世違胡足詫武皇好少臣已老孟子尊王君尚霸
嗟乎夫子幸遭時諸公衮衮皆流亞德尊不過五品薄
歲晚曾無一飢暇君恩豈必間湖海家事姑惟問桑稼
此行端可振頽俗令我短轅今欲駕

遊鼓山

鼓山聞天下一見名不空自從周職方閩在王會中登

山亦幾人興寄隨所逢騎君常惕日遷客多悲風劍川
發甌西萬阻與海通忽焉得平壤北山矗其東我行未
及巔已見國勢雄三韓到吳會不可道里窮俯瞰南來
帆沄沄自朝宗曩時諸降王各撫千里封相招神銜圖
旅獻東都宮東都今何如代馬鳴蒿蓬一春長雨霧明
日歸樊籠恣探泉石幽篝燈道歸筇

和孫偉卿雜言十章

萬事如浮雲可翫不可有三年刻一葉未就骨已朽

可憐負薪子誤有廊廟志出門欲何之馬拙車未試
一鉢腹果然身外百不須深知飢方朔不似飽侏儒
墮落生死間大患為有身老子識未破天地豈不仁
幽居悟前疲寡欲得身健筮之此何祥厥繇無水困
有書但挿架有門亦常關是非天下爭而我土石頑
好酒來誰家明月得我心把酒弄明月醉卧盜不侵
阮窮果何尤利達竟誰在眷言荷鉏人妻子敬相待
或歡著子書我恐落人世呼兒具紙筆一歲復一歲

人事盡鄉曲田租了王官獨於大海枯不改古井寒

送林正仲丞玉山

去年我為客持酒送君歸君今理征驂我適卧舊廬人
生足離合仕宦相乘除科名餘十年丞縣亦既遲顏色
日愈好絕口無歔歎自言有時命歲宴知何如深藏濟
人具不作借勢書虛名多自誤徐步乃疾驅從茲拭老
眼看君上亨衢

和林懿仲喜雪韻

常賜厥咎何君相疚朝夕愧莫慰群黎淒其望三白是
心與天通昨夜平地尺叢筍在東阡耰耨在西陌忍待
明年飽欣及吾事隙海宇正無塵草木亦煥赫遙知紫
宸朝千官手加額溫綸粲龍光賀牘交馬跡銜枚懸瓠
城仗節屈延澤獨擁藍闕馬共飮潯沱麥更願吾君相
對此念忠赤當今挾纊溫恩意到疆場有士如有年要
宣旦日積袁安自甘寢掃軌無過客

再和前韻

冬夜苦難曉短景復易夕安得戶牖光不待東方白恍
如游化城瓊臺若干尺英華發林藪餘彩散阡陌平鋪
浩無垠巽入微有隙忍寒貪縱觀未願朝曦赫柳綿著
歌茵梅片墜粧額矍然羣汗中有意欲比迹自識玉皇
家癯仙陋山澤新來學為農遭歲屢無麥稗子色恒饑
老婢脚盡赤一鉢今有待喜更問瓜場歸來看牀頭瓶
粟幸餘積且以炊春醪號召已散客

除夜用前韻

又添犬馬齒常恐牛羊夕牙無數株半鬢已太半白六
朝貴人家珊瑚高數尺復有陵邑豪沃壤動連陌居然
燕巢幙忽矣駒過隙伊傳亦中壽至今名赫赫蒼苔卧
風雨曾乏斷碑額中原五十載兵燹亂禹跡誰當懶折
腰去學陶彭澤憂端壓不下中夜歌秀麥昭代豈無人
腰黃眼前赤鴻儒籌禁省壯士守邊場罷歌且盃酒澆
此懷抱積柴門剝剝響已有賀年客

和林宗簡除夜韻余與宗簡皆病餘而除夜皆

賦詩因反前意

窮懷卿相憂老作兒女悲百爾皆妄想一粲看新詩短
長總歸盡君閱古盛衰煌煌五侯家寬作數世期經史
或不讀名字亦奚為茂對乾三陽靜養月一規

再用喜雪除夕二韻寄宗簡

百年彈指頃羣動不遑夕變彼情游者長夜浮太白豪
俠旁無人卧我樓百尺衲子縛禪靜不敢踐桑陌武夫
髀肉滿睥睨候遣隙道家求不死真火養陰赫躁人干

速化自點雷門額書生苦穿鑿奇字窮鳥迹何如吾老
農一雨犁春澤相忘與雞豚所辨纔菽麥不聞有孔子
安識由與赤紛紛舉世士肝膽自疆場老翁捧腹笑空
洞無一積有來問時事請以臆對客

子歌我有感我和子益悲文武有天下二南無變詩陵
夷及其季小雅亦既衰殷人早墜命秦氏不及期治身
如治國天壽人所為舊恙何時已與子看前規

賦笑蘗簡諸友

我欲待明月相從弄芙蓉月郭一再滿我行竟徐徐誅
茅困黃埃開卷疲蠹魚纏縛二事間紅披綠蕭疎秋風
白髮生撫事增歎歎美人隔雲山芙蓉並吾廬近者不
得見逾遠還何如花無三月長人壽千歲餘相期不朽
事勿與草木俱君上鍾鼎銘我作山澤癯

送楊似之提舉湖南

昨日有客去分符今朝有客來攬轡
蕨芽掇盡筍可刷
送客焉知老將至儒雅風流能有幾
南宮先生無乃是

十年不復夢蓬山萬里何為隔湘水葉公歸然地官貳
顏公領袖天下士星聯郎署尤與何次第諸公亦連茹
一時臺省舊名德十見班行已三四可令僕馬病崔嵬
獨抱蘭蓀吊憔悴漁樵混迹山窮處故故肯臨人不記
酒半停盃問鬚髮夜闌秉燭徵文字多時渴見痛折節
萬事要看方得意先生行矣扈甘泉請自此心扶大議
薛士昭寺丞赴衡陽守之翌日而似之吏部至初似之
與葉侍郎叔羽顏祭酒幾聖尚書郎尤延之何一之同
在館學今皆還
朝故并及之

哭呂伯恭郎中舟行寄諸友

去年上溪船落日建安旄今年上溪船濡露金華草當
代能幾人胡不白髮早念昔會合時心事得傾倒倚廬
魚鼓夜聯轡雞人曉搜接混茫細剖入幽眇挹注隘
溟渤扶携薄穹昊斯文何契闊之子復凋槁百年在無
窮寥廓一過鳥家人徵舊聞學者拾餘橐區區存萬一
散逸誰可保君看魯論上彭壽顏回夭于今懸日月豈
必言語好儻無後來者泯沒秋毫小南浮吳蜀會北顧

關河杳懷哉各努力人物古來少

張冠卿以前詩懷哉各努力人物古來少之句

為十詩見寄次韻奉酬

明月不可浣有時障氛霾芙蕖生淤泥豈必所處佳老子苦鍊藏釋氏多遣排如欲盡物累自古誰好懷

連楹著胡椒環堵誅蒿萊節士亦良苦乃築懷清臺世故何浩蕩人心亦崔嵬之子訪田舍厥繇安在哉

冥心觀宇宙孰是同與各夜旦無反惡日出星河落此

有齊人瑟彼有荆人璞嗟余耳目短豈故重然諾

朝雞警冠劒巷犬吠村塢胡然子列子越在鄭東甫永懷王黍離莫與戍申許雞犬各有役人亦宜自努

說合何必然金化黃河塞真然說不合千鈞等蟬翼纍纍近丘墓浩浩古載籍崎嶇蓋天意解后匪人力

我友天下士逝者八九人非無新造交亦有久故親可與共安利未可同隱淪欣然得一箇迴首終酸辛

秦人弊申韓亡梁吕崇佛六經獨何罪莽亦竊大物堪

嗟二百年吾道功第一熙豐餘論在河洛諸賢沒

澶淵竟要盟老萊氣安吐韓范猶自憐不遂臣西虜人
材繫其逢事業隨所附千載有南董何啻今視古

江梅歲已過燕子春又來不愁吾鬢霜所恨此志灰扶
桑燁燁明闔闔蕩蕩開欲往豈不可致遠非駑駘

子歌我三歎我和子一笑方期俗耳合勿與知音道頗
聞古韶卷不落人間調悲歌泣鬼神妙語無餘少

黃巖張之望之立來訪與遊梅潭詩以送之

張子好兄弟別我今九年東風刮眯眼雙鵲忽墮前坐
定看兩鬢喜極意慘然來日豈不多此意合少延念子
伏巖穴有作皆巨編稻粱未暇謀從我志獨堅虛名適
相累浩嘆當誰憐積雨得新霽綠漲彌百川載酒問何
有漾舟隨所便與子梅潭游以茲寓惓惓傾崖俯仰立
中有飛瀑懸平地儼閭闔晴空自雲烟既見各有得欲
語不可傳衆妙在領會天成謝瑀鷁子歸有新詩時寄

三兩篇

和張孟阜尋梅韻

平生拙狀物出語輒自咍久欲頌梅花恒恐累紙寫不
該羨子年少氣豪敏詩筒往往歲一來語不驚人意不
止筆力待盡千松煤我以病驥追霜隼著鞭不上嗔人
催置詩太息梅困我恨不縱斧尋條枚嗟乎孤山無人
老坡死水邈竹外誰低徊我嘗欲擬禁字體不道雪月
冰瓊瑰退藏物後獨笑傲奄有歲晚多驚猜紛紛自謂
好顏色萬彙禿立皆堪哀模將此意入詩句十年未就

梅空開君詩却恠梅不早令我內熱紅生腮強隨嶮韻
終不滿今年又恐坐看落片飛莓苔

送劉茂實宰奉新

遠別欲無寐細論誰有酒今當作劇縣君意亦樂不江
湖吏道僻歲月民勞久救之敝精神自愛終袖手要中
名甚美用意物所咎君觀蘭桂林餘茂及樵樵移根託
客土顏色非故有贈言幾滿車一字堪皓首於焉但裁
擇對越二三友諸賢在當路公論在衆口

送趙叔靜教授閩中四首

家無宿舂糧適意恣所向征鞍催上官帆海看疊嶂有
言及當代浩歌益悲壯以茲冥周行盍在幾人上

讀書須讀經學文須學古青衫故不換白髮早可數我
亦窶人子風雨蔽蓬戶胡為數相過夜話恒過午

炯炯出萬壑冰壺縣清秋孰與玉璫中穆然養黃流孤
松高半天蘭芷復過幽看君最雍容柰何短自謀

百吏不可試卷懷州校官翩然落南閩不為荔子丹彫

蟲妙經術倚市多儒冠吾道未必貴政此良已難

遊白石巖

地向東南傾石際滄海立蛟鼉限波濤雞犬得城邑居然通國望跋莫他山及道人獨有之置屋三四級幾看星月爛却聽風雨急于今二百年我共冥鴻集晤語夕陽低對酒秋旻濕明朝江上舟避雨漁翁笠邂逅一俛仰此道可於邑

和孟阜老梅韻

朝遊山南莫北隅修竹之下手所披五步一顧立不趨
柔枝弱幹千萬餘粲然笑倩多新奇歲寒安用衆穉為
驚嗟恠恠丈人行縞衣籃縷氷斲肌莓苔雪片凍不飛
玉飾其末璣衡散藐姑之仙下縹緲蒼虬為駕羽葆希
三閭大夫從女湏枯槁嬋娟却並馳張子愛之亦既寢
人不得覩以我歸我生自視梅孰如滄江獨立兒女嗤
年來稍稍學折枝柰何復與此老期

再和

望美人兮天一隅薜蘿為衣顛倒披水竹隔我不可趨
令我搔首三歲餘漢庭年少六七奇鬚眉皓白來何為
我欲避寢問之道安得玉貌生枯肌長翁傲睨欲奮飛
滄江釣雪蓑笠散少翁頓挫拚牙角笑齒一粲知音希
樵家斧斤磨以湏過者萬人人背馳梅乎梅乎我非癡
持汝二老將安歸古來弱植剛不如孰有嫵媚為人嗤
君不見孤竹之管求孫枝汝盍早定歸山期

止齋集卷一

欽定四庫全書

止齋集卷二

宋 陳傳良 撰

古詩

送同年林多益丞寧海

同里衣冠近闊疎同年齒髮多衰變美人宜在玉筍班
隱吏亦隨花雨縣有杭一葦逢迎可每食雙魚甘旨便
顧瞻周道竟何如善為身謀吾豈願清廟笙鏞濟濟陳
碧梧鸞鵠深深見由來盛事歲月晚誰到脩途肝膽健

楊花吹水酒搖波一請加餐再無倦

送謝希孟歸黃巖四首

紛紛竹帛傳浩浩金石刻淪亡已無限存亦誰愛惜如
何伏羲氏文字二三畫姬孔豈不聖用以演周易

法令如牛毛斯鞅信手成簿書積丘山趙張眼愈明萬
人立下風國勢尊且榮未省三代前誰獨有此名

圭璧襲繅藉山龍飾衣裳不聞燧古初而興自虞唐毀
車崇騎射隸作篆籀藏至今人便之秦亦忽以亡

累觴以為歡班荆以為儀交際貴如此勿使至意虧頗
常恠小雅鹿鳴至魚麗賓主禮百拜六經似支離

看筍和潘養大韻

兒童纔卅角兵衛忽森戟十日不汝見尋丈出咫尺隱
几觀物化軒奮恣所極褰裳欲從之世事有繩墨

贈尹紹伊

吾友尹紹伊十年抱心疾休然萬事廢豆子黑如漆從
之問舊學歷歷不遺一佳篇間哇鄭法語雜方術豈其

遇人耶託此訪遺逸張皇鬼物恠漏泄宮禁密君看服
烏喙孰與近參朮

送郡守汪充之移治嚴陵

方郡小旱汪禱雨甚急禱三日而雨至郡

人大喜是日
有改刺之命

挂梁龍骨經時蟄井井黃雲秋已及十日不雨民未急
使君日膳長蔬渚澄空颺颺雲霧入饁婦休眠兒覓笠
村舂化出雲子粒市上明朝升二十農家語圓商語賈
恒願使君無疾苦自今一鉢吾腹果健看將母從簫鼓

馮翊扶風天尺五見說嚴陵在何所詔書奪去萬舌吐
九重欲扣君門阻棲鳥護巢駒戀阜東人自視西人好
那知湛露漙秋草春意平鋪無剩少有客解事鬪然笑
元祐治平諸故老身要人扶功未了誰知青絲絡馬橫
門道應笑江湖華髮早

寄題陳同甫抱膝亭

稻粱不難謀軒冕亦易得胡為抱膝翁惻惻復惻惻秋
風墮碧梧鳳鳥去無迹愁吟草際蛩兒女淚盈臆忽然

一長嘯孤響起空寂令人識雅頌一唱三歎息室廬在
路傍耕鑿在民籍行人聽笑語稚子共眠食讀書果何
罪鬚髮又半白此意太勞勞此身長抑抑抱膝且不可
出門更何適但勿問門外蓬蒿若干尺

送葉正則赴浙西憲幕

頻年送行客酒罄詩不工最晚與君別柰此百感叢岐
山有鳴鳳雅頌移幽風于時二老生出處海上同曹劉
對匕箸失色一語中明朝蜀江水不與灞滻通人心起

毫末世故闕鴻蒙乃知貧賤交不下王霸功霜根宿病
驥雲帆背蜚鴻秋水能隔人白蘋况連空相從自束髮
各去隨轉蓬今懷欣有合後會苦未重鱸魚直萬錢羊
酪醅一鐘願君養盛年我友半已翁

送陳益之架閣

論事不欲如戎兵欲如衣冠佩玉嚴重而寬平作文不
欲如組繡欲如踈林茂麓窈窕而敷榮楨幹盍亦煩繩
墨滋味何如餘典則吾宗受才萬人敵排空所向無遺

力親喪三年面漆黑交情一語千金璧明朝不繫鼎撼
壁裘馬借人無德色作掾閩山可蹤跡擬將秉旻空嶼
蟬相君有令民未得勿問堂高若干尺春江瀾渺風張
席欲言江水何終極貧賤相依鬢毛白吾可雷同名送
客浩歌未放情彌激君看風雅詩三百亦有初章三嘆
息

翁誠之尉慈溪再擬祖送不及

昨來久佇驪駒集今來悵望攜烏急中年送客亦多違

先事徒勞後無及江頭祖帳幾百人落紙珠璣詩什什
自哦短韻意甚得亟欲陳之復羞澁君方筮仕從茲始
驛驕開路日千里若逢人話子陳子侏儒一節今如此

送鮑清卿教授莆中

閩中豈不好莆中況多儒其山有丹荔其水有子魚艾
軒諸老生典則故所餘堂堂退傳門海內欲曳裾宦遊
得此樂餞者酒滿車我亦勸君酒我意獨未舒嘗聞入
林獵不可背水漁背水漁尚可背時更崎嶇方今朝廷

尊紳笏日走趨官多豈勝記勢遠復易踈媒身衆所同
藉口誰不如柰何但溫飽去向天一隅平生拙自謀蓬
巷歲月除更事亦既熟畫此未必愚豈有服蒞蘭佩之
以瓊琚令人愛不見搔首空踟躕

作南塘記郡守沈持要以詩來謝次韻奉酬

周公作雅頌退然在豳風功成貴無迹名大謗亦叢彼
人自標置刻畫豈不工君看榛莽間斷碑卧頽墉想當
在世時拳拳効深衷胡然今弗省身後議論公達人悟

物情玄覽昭有融區區強名我谷爾來何從沈公天下
士於今萬夫雄邦人見未嘗譽之口不容請將氏南樓
語盡意未窮公詩陳誼高耻與好事同年登百廢興解
后吾何功勇去學休影倦游謝遺蹤吾方笑征南雙雙
勒堅缸一以棲山顛一以沒水中

送謝倅景英赴闕

言詩必南雅自鄒吾無譏嗟余生已晚觀人以觀詩人
情日變化往事十九非相從飾邊幅欲語懷銜羈久不

見官寺下與家人夷渡江六十年得此心目疑早從諸
公游晚佐一郡治居嘗陳誼高動與作吏違大白浮朋
簪單車歛民靡多文雖素履用拙真良規二年意綢繆
一別事渺瀰有酒公不飲贈言我何裨穆穆清朝班僉
曰尚德宜何妨著此翁衣冠皓鬚眉

懷同舍石天民編修

山陰不得見見期在東陽東陽忽歲華欲往又阻長貽
書輒無報有便復寄將以君懶於書我豈望得當永懷

十年別動止曾莫詳君貌今何如孰與我老蒼就使白
髮同脚力誰弱強日飮米多少飲酒可幾觴尚能甘寢
耶比之昔對床嫂氏亦晚景吾婦伯姊行為君過客頻
膏沐當不常有兒若干人已未勝冠裳但要能簪門勿
問鄙與臧一紙細說似慰此遥相望末乃及田舍何有
還何亡丞郡祿已厚豈不可小康憶昔夜夢君託交少
年場竦身而掀髯眸子炯炯光依然論時事悲壯淚以
滂我方閉門嬉謁至即暫忙婆婆娑松竹下細數秋葉黃

舊志益凋落羣書半遺忘請君勿他及却使我意傷

次韻蕃叟弟月下有感

平原接翠微修竹圍綠淨乃於此中間更以皓月映佳
人笑隱几萬物獨我正幸哉吾有母侍飲得餅罄

夢人誦詩覺省數句足成一首

三人共一被寒夜爭抽牽一人耻不讓起坐遲朝暄明
朝復雨雪忍豈無春妍四時各天運二人正鼾眠

送曹器遠試臨安二首

青衫豈必貴未得不可已
皇皇海內人趨走共一軌
生前極浮榮沒後抱深耻
他山有隱淪一笑粲冰齒
豈知天地間樹立在人紀

大有扛鼎力小有挈瓶智
誰當頓八紘舉以掩衆器
煌煌一百年此道最宏被
雖躋三事尊亦起一藝試
或云科目弊此語復有味

約同舍蜀人王德修三首

遠莫遠關塞鴻鴈來年年
我嘗按輿圖嶠漢在眼前
胡

為與君別壯齒今華顛下峽君有期會吳我何緣令人
媿不如鴻鴈得自便

疇昔夢遡江巴陵至瞿唐兩崖束秋旻中有一帶蒼安
流進分寸怒去千丈強求君竟不得望之涕淋浪往日
事已然來日理未詳

橙橘方粲粲魚蝦亦多多能舂半年糧豈惜一見過良
夜月如霜聽我苦別歌翳翳葭蘆鄉風定水自波或者
阻君舟柰此佇立何

次德修仙巖韻

我家仙巖人跡稀客從何來此何時岷山之陽適海嶠
萬里欲寫心精微瀑泉自雨一丘壑有龍蟄不隨羣飛
病樵弛檐渴猿喜雖未作霖良已奇吾聞岷山天與齊
仰止不見如調饑君登絕頂小天下此縱有山安足嬉
翩然肯過非所期此道遼闊車誰脂願言稅駕毋遑歸
為我更賦崧高詩

再用韻呈德修

一日一見猶為稀如何十年見無期昔方壯歲意輕別
一笑聽君歌式微江流永矣劒閣阻恨不羽翰能奮飛
不圖今日已華髮話此恹恹還竒竒桑麻不競蒿壓屋
厚祿書斷兒恒饑誰當附熱斷冰雪歲晏獨可相從嬉
功名富貴各有時人亦空自為韋脂與君持此將安歸
滄海雪山無盡詩

夷門歌送修德還闕

萬古江入海吳蜀有不通不通誰使然人自為異同昔

在李孟錢士各懷上封靜言彼何尤亦各徇所忠恭惟
宋受命三姓皆朝宗斯文已百年名世纔數公眉山與
金陵柰何不相容大雅如關洛亦復互詆攻朋分文字
間禍起師友中四郊忽戎馬塵滿夷門宮往事已覆轍
後事如飄蓬一飢忘苦饑一褐忘苦冬身謀每不長王
事靡有終有客獨惻惻萬里興深衷相過話離合歷歷
繇熙豐我久世慮薄念之涕無從貧賤將安歸功名在
其逢有能用斯人可使百阻空西人不為西東人不為

東

借書一首別薛子長

山阿著柴扉陋甚誰盤桓美人此何求鉅竹數十竿日
閱書百篇尚覺日力寬欲從我借書我書何足觀辛勤
抱遺經及此鬢髮斑一語未領會累日不自安雖更聖
人手亦恐衆說謾況復秦漢下曾莫修與刪致之獲麟
前存者今若干我無以裁之望洋久空嘆羨君方盛年
恣意涉浩漫又聞書少多不繫學缺完讀書固匪易用

書良獨難昨來荷堤上嘗試及孟韓此話如涓埃此道
如丘山

寄陳同甫生日

南國雨初潤西風水微波持酒欲勸君柰此道阻何天
地自久長日月良蹉跎志士惜少年用意矢靡他豈無
文字功百代名不磨胡然朝攬鏡夜起瞻星河思婦視
貞操驕人視勞歌曾微強飯書覆出為詆訶永懷姑射
神尸居養天和下視塵冥冥鴻鵠謝網羅身將世誰親

得孰與喪多請君以尊生我亦以養病

述懷

有客盈門飯不足有書千卷兒懶讀王公勞問場爭竈
樵牧相忘盜騎屋古來堪笑如我少生無一事能恰好
獨有居閑可引年我又不然華髮蚤

簡鄭景元

西風肅萬物於卦昌為兌說言就凋蟄之死矢靡悔方
當春和時動植出草昧喧號聒穹蒼怒長彌大塊紛紛

誰則敢所恃蓋有在

簡王道父

瞻彼萬仞巖亭亭上烟霞其下寒淵水清不容魚蝦閔
予生好修而居東海涯顧見泥中歲日食百萬家浮名
太累人未語衆已譁為海不為淵何道以自瑕

贈東陽呂望孫周登二武士

鴻門無人易水寒安得壯士久所患求之市隱戎行間
紛不當意鬢已班匈奴未討憂萬端此得兩君聊自寬

有石堂坳立磻斲百夫睨之欲舉難兩君挾起如弄丸
舞空一葉風團團呂君忽作戎衣冠漉酒於地盟血殷
長劒久倚燕然山義欲為漢誅樓蘭九重深窈虎守關
竟以劍器博一餐語未良已聲珊珊兩蛟出沒萬馬攢
夜闌月暗天汗漫滿堂悲憤淚欲潛嗟爾兩君誠義肝
我方乘障荆之蠻五營諸將皆秦安髀肉久不堪征鞍
誰能喚與百辟看但得汝等一解吾君顏書生老死不
足歎

書黃巖丁明仲墓誌碑陰

葉君隼字雙南金子子拳石藏幽深百名以上辭不淫
我豈識子酒漸襟黃山之阿墓林林斷碑日爍秋雨霖
彼豈孫子力不任人莫過問嗥孤禽子以窮餓死苦吟
束棺逆旅無衣食末乃得此世所欽子視昔者孰與今
區間壽短升與沉長留天地誰無心於中詩人最崛嶽
竟亦朽腐如書蟬何獨遺子天球琳上與郊島名相尋
雖無薦藉鬼已歆況立之後主奎鸞期以數歲頭勝簪

有田可稼桑可絰收拾舊蒙編朱綬未必千載無知音
請我書此碑之陰大亮一語不肯侵嗚呼讀者悲不禁
牛羊勿踐木森森

止齋集卷二

欽定四庫全書

止齋集卷三

宋 陳傅良 撰

古詩

赴桂陽道中喜晴書事

十日九雨垂垂雪馬僵僕病泥乘橈披衣闔戶得星月
喜有耻向妻兒說耳根久與朝雞別熟睡八年謀未拙
乞米作糜蒙被啜客來午漏家僮出如今兒噉妻愁絕
我縱喜晴心已折可以藝麻多筍蕨苟有一丘吾計決

奈何諸公廨役皆豪傑尚愛舂陵老元結

簡友人二首

南去有五嶺北來有重湖水清石益竒往往中州無在
昔宦游者越若韓張徒胡然自衡陽隻鴈亦不徂
安眠夜至卯休吏日加申廩稍亦已厚養病非隱淪恨
無封君法老矣藏其身遄歸豈不欲更有宜歸人

和王教授謙叔述郡圃韻

守邊豈無事治圃亦有說朝看士飲羽暮與客投轄且

以示多暇且以勞同列我生腸九回世故肱三折環堵
僅尋丈短亭聊歲月忽蒙當宁記濫補專城缺區區自
米鹽在在欲黼黻矧惟有茲山未省從何月張羅上空
庭尋斧及勁節舊觀誰緝熙新思蓋綿蕝幸方一小治
謂拂雲尚可六太息謂芳州漱玉風月釣磯錦湖撫松胡然召南人而驟
歌所菱

臨桂尉楊渭夫以詩來因次其韻兼簡同僚

萬物各美惡一室有面背去來故無恒欣厭惟所會有

能悟茲理何必著幽邃後圃並山麓修竹積空翠斧尋
自何年樊養特過計陳根獨遭時沃壤亦借勢居然成
獨清可以掩衆媚亭院起中間湖潦粲前際於時吾豈
敢謂此天作對新詩忽盛談俗狀良內媿子方及歸期
客復攪離思謂謙叔
教授尚當封殖之去日如始至

送宋伯潛宰高安

秋風日來諗役車何時休有鳴丘中琴玉瓚懷黃流此
腰不可折此笏未忍抽亦入鴈鷺行而為稻粱謀四海

揚誠齋吾道得自由悠哉思萬端寄矣試一籌風詩訖

於豳易象重以周

偶語詩易因詩及之

當知橫空翮不若逆水舟

送楊渭夫歸省

應侯氣蓋百粵小朱侯誼與灘江長兩侯愛士早成癖

惟甚渭夫懷故鄉士窮萬事一不就就得一事窮何傷

渭夫壯者忍窮久老驥欲秣胡沙霜吾家何在雲橫嶺

趙媼不寃劉兒瞋孰與親旁煮湯餅

渭夫初至臨桂劉氏兒被殺賊不獲

不數日渭夫竟得之既而權義寧令復有殺趙氏媼者或執平人將處死人以為非渭夫莫能辦府召渭夫與

墮力未瘁朴畧自光恠挺持匪標置終焉人偽盡獨以
天巧遂吾聞古有道純朴去故智與世每如此全身亦
幾是疑將問歲月缺弗見載記誰言導江時手植特嬉
戲世人那得識會有神禹至

牡丹和潘養大韻

看花喜極翻愁人京洛久矣淪邊塵還知姚魏輩何在
但有歐蔡名不泯夕陽為我作初霽佳節過此無多春
更燒銀燭飲花下五陵佳氣今方新

張漕行部過湘岸有作因次其韻

春晚得新霽草木日夜綠陽光初蔽虧野暝或單復美人浮湘波領此入蓬屋故放歸帆遲更呼漁火續窮探物精華盡付詩凡目憶昨欣晤對令我忘休沐劇談酒行希危坐兵衛肅相思正倚樓所寄忽累幅瑰辭堪買貧軼韻和難屬自從楚騷興悲些速差玉後來數唐人歛乃巖隈宿世無梁昭明斯文又誰錄

送王南強赴紹興簽幕四首

詞章行天下嘉賴二百年甲科至公卿誰敢謂不然有
人妄媒孽一世所弃捐我亦欲護短諱不言幽燕汗簡
在吾後覆車在吾前

人人尊孔孟家家誦詩書未省有宇宙孰與今多儒儒
者道如砥豈其自崎嶇申以黃老廢賈以絳灌踈漢書
嘗紛紛政爾門戶殊

歷官如歷階越等多所傷奈何坳堂水持綆萬丈長誰
無斯世方乃此袖手旁永夜淚不禁仲尼故皇皇又聞

雖小魯乘田問牛羊

聞之浙河東見之湘水南未歸却相送既喜復不堪行
矣乞自便帥幕或可參君方乘日長勉為停朝驂我池
有螃蟹我園有黃柑

題明皇醉歸圖

騎者兩人扶不正夾道誰知為萬乘一人前馳一顧後
懷欲並驅無號令狩人亦忘記鷹犬仰視只愁天欲暝
有司刺候上起居杳莫得詳宮鑰靜嗚呼開元自英主

前鑒竟遺盈幅紙君不見漢宮圖妲已未必當年甚如
是

送范憲東叔帥潼川四首

離逾十年合合復十月離往日苦無及來日忽未知江
源與海通吳會與蜀違通固天道常違亦物理宜勿作
兒女感是中有精微

相從意氣豪相知鬢毛斑細說竟昨非淺斟始今歡每
懷吾黨多未捄此世難一則琢冰雪再則紉芝蘭騷人

絕芳潔孰與風人寬

有書但遮眼有位亦養病養病猶近名遮眼已患多聊
復歲晏爾柰此人遠何聲光正橫空議論如懸河宜君
見別輕款曲理則那

逢人九頓首遇事三折肱雖知少為狂正復老可憎吾
今有儲粟吾昔有短檠魯論訓何如周易讀未曾言歸
又言歸兒女喚不應

行湘喜雨簡劉公度周明叔

將行客有戒正熱人不禁出門一昔雨解纜十日陰湘
山益以碧湘水益以深天光接雲夢野暝蒙衡擲蠅無
盤中蹟蟬有木末音顧乃廢枕簟爰方索衣衾我起問
夾岸往歲孰與今衡茅或數間叢竹皆十尋蒲蓮間華
實鷗鷺時浮沉老穉各有得漁樵不相侵早插禾欲孕
新炊粟如金為之失倦游於以成孤斟永懷泛湘人屈
賈多愁吟往者亦此境今者亦此心空名但千載佳思
誰一襟時哉不可失浯溪更駸駸

劉連州和前韻因道湘中之樂以謝

湘中足可樂誰苦愁不禁變彼蘭蕙姿固怯霰雪陰賈
子天下士子何念慮深貞元兩御史南還會於郴亦復
相唱酬間有亡國音愚溪更憔悴中夜起擁衾而得欵
乃句膾炙循至今我後五百年公來適相尋田疇歲廩
廩獄市春沉沉寬書日夕下民蠹祛牟侵況也省賦甚
小郡至萬金交歡有陸賈私恨無羊斟我飽竟甘寢公
暇多長吟廼知湘中樂關時匪關心湘民忘勞力樂極

翻沾襟却愁吾二人四牡歌駸駸

聞葉正則閱藏經次其送客韻以問之

順水去吳會逆水來夔門萬古逆順舟以斗占旦昏曩
余好百家信不及魯論初亦半喜愕久之乍亡存白髮
一無成頗識委與源風停波自平却視消長痕六經夫
如何夫子手所翻恒言但桑稼恠志無鵬鷖規圓而矩
方往往萬巧攢諸儒各有得長短賢若干玉帛相會盟
兵車相并吞一語苟暗合羣生皆晏溫經成今幾年嘗

試以是觀此道未軻死此書未秦燔猶之斗經天於以
生蓋渾西方亦人豪國自為乾坤書來入中州坐使學
者奔君豈捨從之或但遊其藩吾聞欲乘槎鑿空訪河
根孰與瞻斗車把柁行江湍

和張倅唐英詠梅十四首

種梅欲百畝誰老意未渝有山在堂背有溪在庭除我
危坐中央花以寘坐隅人固不可親花亦不可踈

花芳以養性花陰以休影更欲從旁謀種秫可半頃衝

寒時一觴我醉花獨醒醉醒兩相忘久矣繫歸艇

因山為高下因水為縱橫恣花欲何之勿撓所性清却
愁雪太深瞻言不勝情有時亦肯來當我戶牖明

我豈愛花者而獨愛此花愛之匪無人詩且數百家前
有水邊橫後有竹外斜但作如是觀桃李亦可誇

人言物不齊相較三十里以梅等羣芳何啻隔弱水杜
陵狀百物無語可著此巡簷索之笑但不禁冷蘂

駸駸入衰暮故作不潔清美人美無度可使一國傾胡

然立林林夾此東西榮對之意自消令我欲近名

以之為雪耶雪或墮汙淺以之為玉耶玉或附旒冕春
前每嘗試歲晏不退轉悠哉似有道可與共舒卷

政應違衆好可忍負幽探以茲落南雅蜂蝶獨遺憾豈
無好顏色一雨竟陳暗誰知歲寒姿可久非可暫

若以色見我色衰令人忘香為衆妙宗妙亦不在香鄉
來芸芸者自意傲雪霜當斯玉立時曾莫一在旁

遲遲可殿後寂寂可鎮浮風人第一章窈窕河之洲穆

如三代英惟此宜與儔不然則臞仙玉簫下秦樓

紛華有心說艷美得目送越在簞葦間顧使詩興動詩
人被花惱盡日手自弄愁吟日不足又作栩栩夢

亭亭湘岸竹炯炯湘波月其中雪垂垂一樹為誰設不
應皂蓋人於此能忘折折之寄相思可以慰分裂

商山皓鬚眉久不見綺黃邂逅一笑粲可與斯人當如
何為林逋托根向錢塘居遺蘭與芷牢愁楚沅湘

先人手所種家在何處村自別此堂堂不知幾寒溫盍

歸封植之歲歲為此言老如霧中看正恐目力昏

招隱二首

將子無登山山上岡復岡朝為朱陽煒暮作陰飈涼磴
滑幽鳥啼林深山鬼翔子兮何所求樂此螭魅鄉國人
佇齊軾吾黨多魯狂望子子不來翠袖天風揚緇塵擺
落盡幽願次第償焦鵬入冥雲蟻虱寬貝陽子兮竟誰
從獨樂無已康豈其羊之饑而可救與臧


將子無涉水水深下無極鯨魚舞浮陽螭首闔陰碧弱

去一羽沉惡來萬波激子兮何所求快此蛟涎滴諫議
起陽城拾遺招李渤望子子不來羊裘號逋客踞坐山
石麤晞髮朔風疾亂流兩白足何日蹕蹕逸扶蹕清逸
倉司二亭
子兮寧不悲饑氓俟唐稷豈其洛之涯而可溫與石

記夢

窪然石壁罅涓涓如絲繩其人指此泉下去為滄溟旁
有玉蟾蜍空中底方平視之鼻通尻徹竅刻畫精泉從
鼻聰入可止不可盈欲問已無人我亦悟我生惜哉烟

火食滓我朝清明



止齋集卷三

欽定四庫全書

集部

止齋集卷六

四十五

詳校官庶吉士臣龍廷槐

主事臣呂雲棟覆勘

覆校官主事臣李駿

校對官中書臣范鏊

謄錄監生臣劉璿

謄錄監生臣黃嘉績

欽定四庫全書

止齋集卷四

宋 陳傅良 撰

古詩

始生七章章八句上皇子嘉王生辰

生為帝子貴本自歷數歸歷數萬億年帝子壽無期今
夕果何夕欲頌皆贅辭但願王此心無忘始生時王看
松栢萌未具葉與枝冲然一點春其大可十圍云胡間
不茂為失雨露滋乃知生意同其異各所罹人均此生

爾王生樂無涯如將與人同請自今夕推奉觴一何多
于以介壽祺王其敬舉觴一念周八維百鼎羅珍羞世
豈無調饑錦綺爛盈門藍縷還誰衣龍樓近日月茅舍
或不支三宮子孫孫亦有孤與嫠吾方貴吾生相彼多
阨危豈伊天地公而獨及我私於焉識仁端一物豈忍
遺當思宇宙間壽域咸熙熙獵人愛麋麋漁人愛鯢鮪
萬物欣自遂況也民秉彛家有舉按婦人有簪門兒王
心至於此壽不數耆頤詩人誦稷功造周本岐嶷首言

民初生次及稷誕彌民命繫於稷此語非夸毗末僚甚
拳拳所愧無周詩

送丘宗卿帥蜀戶部侍郎丘公被命以煥章閣
直學士出帥全蜀其友生永嘉陳某作詩三章
送之一章以重別也二章頌也三章以道其歸
也

嘗陪諸老後亦與晚進游有能一夕話可洗萬古愁昔
君尚青衫今我已白頭闕下何匆匆蜀江正悠悠一請

工治庖再請拙操舟

好靜從古始尚恩極今時寧使舉國貧勿與一士遺熙
寧固前轍元祐誠良醫我亦欲宴興人方乏朝炊持之
訊人傑人傑良自疑

前瞻及河隴內顧連江沱邊籌尚彈壓民瘴須援抄方
當上懷遠况復歲薦瘥宜公去帆輕歲月亦易多西人
豈不好柰此東人何

短歌送呂子約丞郡天台

露荷不肯附綠漲石榴自欲當朱明我無一物與君別
持此薦以雙玉瓶榴花結子荷成的定亦扁舟去為客
良集偏於吾輩慳新功或向他山得我歌雖短聲若長
君不能飲須滿觴申公何在麗澤死又送冥鴻謀稻粱

送黃子聞得縣瑞安

西都循吏無墨綬密令忽用為三公仁人遭時乃自見
不係官爵汙與隆黃君崎嶇髮半白得縣吾州滄海東
平生經術久未試今幸小試難為功休聲出自士論衆

遺愛見於民力窮如君作吏豈擇便第勿謂難斯令終
嗟余欲歸歸未得觀政不在漁樵中逢人每似卓傳傳
此道萬古君王同

送陳仲孚還里

意勝不受暑交深欲忘言子車今日脂我經何時箋卜
稼豈無疇頌橘亦有園掛冠特易耳柰何子盛年

教授李夢符惠宣聖畫像用韻奉酬

一藝必有師尚論襄與夔一國必有師尚論管與伊信

知師道尊分與君父夷吁嗟文王沒斯文屬之誰微言
二十篇論次自學而傳之者顏曾其後則子思方當周
之衰諸子出恠竒王公各師承一語可解願見之擁篲
迎不見嚙其眉孟子獨推尊是惟聖之時苟不本孔氏
皆放其淫詞於是尊孔孟誕作百世師自非戎翟秦孰
背此道馳本朝郡為學薄海尸祝之往往屈萬乘降升
廟庭垂我作暮春堂魯論以自隨扁題落天上鬼遁蛟
龍移江山護昭回誰敢或訕嗤中有夫子像來從魯家

兒廣文以遺我溫厲尚可追吾今得吾師下視衆說卑
世世萬子孫永此巢一枝

還徐叔子犀帶

徐子贈我舊寶犀宣和國工所事治玄玉十截黃四垂
厚且半寸徑尺圍方廉整不刻毫釐金飾諸末柔丹韋
寘之止齋光陸離天吳海若不敢窺柰何骨相堪蓑衣
自得此帶逢百罹我服黑角二紀餘歲月幾半蒙蛛絲
識與不識皆歔歔恨不披拂來隆墀湖湘老把乘邊麾

次第三節登王畿修門再入留郎闈上皇一見玉色
怡閭步蓬山上坳螭向者所恨今交譏懼瀝肝膽得請
歸自意永與漁樵嬉急詔適際潛龍飛誤恩狎至湛
露斯古來逾分天不宜百炊未滿萬事非還觀櫝中一
斛願吾腰安用爾帶為徐子盛年脩幹支才華不數紛
紛兒請以帶去藏待時拖金縣玉未可知招招車騎來
何遲苦勿留此令我悲君不見在昔十圍終失之終朝
三禡事尤危況我昏睡誰護持亦恐夜半神運蛟龍移

憶筇杖

岷峨山下筇竹杖危者使安衰可壯秦皇漢武窮兵不
可得我獨得之今丞相前年有旨還故園其冬急召朝
日邊半歲驅馳數千里賴有此杖常扶顛倉黃又別脩
門去私室無人謹呵護夜半雷霆下取將兒叫妻啼留
不住我聞丞相下峽時一物無有杖自隨屬當晏朝立
仗久憐我弱脰疲坳螭如今步履隨衰草十步趑趄九
步倒假如杖在欲用之山精海怪震怒亦不保君不見

杜陵桃竹歌常恐失之君山湖上之風波
梓潼使君之贈尚爾耳况自丞相還如何

蘭花供壽國舉兄

山丹吹出青藜火金蝶窺叢何婀娜
朱槿更作猩袍紅

夸道風人嘗印可

詩顏如舜華注舜木槿也

沒利從旁粲然笑奄有

諸香誰似我素馨蕭然山澤臞至香不數脂粉腴
衆芳固自有醞藉要是傍人之庭除何如琉璃千頃水涵碧
淤泥不解汗芙蕖幽蘭獨自倚脩竹生來未始受諸觸

深知抱此竟安用用多亦豈芙蕖福若以滋味屬厭人
齏粉此身人不足今夕何夕新風露入秋一雨天西顧
止齋有兄永難老止齋之弟愛莫助但以清白傳之萬
子孫歲供蘭花美無度

東陽郭希呂山園十詠

幽人有遐心薜屋涵澄空況復得此山心事與境同

右清曠亭

一壑亦易得安得挂林林道人偶見之不是歲月深

右挂壑

兩崖束青天中有月皎皎乍可謂月低不可謂天小

右月峽

促膝有仙凡爛柯無小大誰知桃源人不在秦晉外

右小爛柯

嘗聞鳳棲梧老鳳未棲令我日佇立不知月東西

右傾月

雲以無心出雲歸亦何心樵牧窺其藏妄意此阻深

右闕雲闕

清曉閱草木各具天一水安用學飡玉將以蘄不死

右玉泉

涓涓自空來霏霏復不見安得自尤物使我耳目亂

右飛雪

凭欄時獨立萬象皆見前若非著眼高亦是天一偏

右壺天閣

驚釜吾已漑吾纓亦無塵窪石以潛之恐有抱甕人

右石井

送郭希呂

我門閉重重我徑阻且深
梅花獨相依聊以慰我心
美人從何來崎嶇自幽尋
亦於琢冰中和南風琴菜甲
尚可羹新芻足同斟不知歲
已華歸興生霜砧欲別復
少住棲鳥歸月林客去鳥
翔飛落花滿牆陰

水仙花

江梅丈人行歲寒固天姿
蠟梅微着色標致亦背時
胡

然此柔嘉支本僅自持廼以平地尺氣與松篁夷粹然
金玉相承以翠羽儀獨立萬槁中冰膠雪垂垂水仙誰
强名相宜未相知刻畫近脂粉而況山谷詩吾聞抱太
和未易形似窺當其自英華造物且霽威平生恨剛褊
未老齒髮衰掇花寘膽瓶吾今得吾師

止齋曲廊初成

但酒勝如水但花勝如草小廊曲通幽竹椽亦良好止
齋十數間足以便衰老簷低遠風露地窄易汎掃淺溪

浮薄觴短屏糊舊橐著書僅玄易過客多韋縞於中榜
退思誰其諒深抱吾思亦已晚吾退盍更早懷哉彭澤
令仰止商山皓維淵有潛龍維岳有藏寶煌煌暮春堂
三字落穹昊昭回際南極鎮撫及東島胡然廼在斯夙
夜惧不保鬼神無世情呵護必有道

次沈儉夫求花木韻

我意何不樂我顏復何怍止齋有新畬耕犢角已繭止
齋有溪水釣席隨所展兩山夾精舍佳處迫廬峴朋來

盡名流燕坐皆勝踐頽然止齋翁心故不可轉厭書或
窺園乘興時陟嶽日月之蔽虧木陰自幽顯雨露之密
踈草色自深淺翁乎一觴詠初不著姝嬖易老探醇駁
風騷較寬褊眠食雖甚佳病患盍加勉謗篋況所招訟
鉅那能辨於焉更悟入豈但苟排遣寄言子沈子所欲
果何件葭豕來春田冥鴻脫秋獮谷蘭猶見紉月桂不
可褰慕遠失之近求多得常鮮請以壯縣才從茲益懷
卷深居勿近市隘巷莫容輦有花門擁篲無花地生蘚

嘗試玩喧寂何者是真外舊學枉初心新功費重研何
如過止齋我亦精文選

春晚書懷二首奉簡陳益之

百舌喜太甚杜鵑恨何深睨睨斯黃鸝律中宮之音物
情自不齊天運初無心道人獨領會杖藜立芳陰

百卉得雨露華滋巧相娛但知說姚魏河洛竟何如我
方悟吾生箋經未成書安得小學師從之注虫魚

題沈仲一所藏周氏羣公書帖

紛紛世上如落花東風卽入西鄰家要亦餘事吾何嗟
斯人故國之喬木枝葉胡然亦流落吾生已晚講聞熟
見欲墮淚那忍讀古來道德功名上傳世不曾緣物重
君不見人間秦漢鼎彝銘與頌子子孫孫永寶用

贈章虞卿

并序

虞卿相別久意其困塲屋舍而它之也忽以書說來
余喜甚留數日晤語不但說書諸學無不涉也又愛
之甚欲作一詩亟稱之輒不就虞卿促歸姑贈數語

章子一別二十年此來銜袖書一編自出已意說百篇
至說五誥尤愕然我今萬事付幽屏是書挿架漫不省
子之書意吾已領且探梅花試湯餅

題僧法傳為沈仲一畫聽松圖

古松不知幾千年直幹欲上千青天
樛枝下與人世接冷風過之萬壑喧
猿驚鶴恠樵牧遁百鬼愁絕誰傍邊
紛紛海內絲竹耳何處縹緲來
懼仙整襟拱聽移永日
置琴弗顧僮敬眠松風有際意
無盡莊騷不數惟易玄

嗟乎深山大澤松不乏斯人往往千載之陳縮筆端若有夜半力一日忽在軒楹前止齋虛靜對立久晴昊亦為生蒼烟畢宏韋偃骨已朽畫工一世脂粉便北湖居士安得此奄有二子雲山傳北湖居士雲山傳吾詩孰與杜老起九原

送畫僧法傳

雪菴禪師從瑾之弟子

問訊雪庵今何如子來搔首更踟躕時於戲墨窺禪悅尚想家傳及緒餘曾點爾各言爾志陶潛吾亦愛吾廬

誰人解寫二歸意欲放風帆還搽祛

題瑞安宰朱元成乃祖雲壑莊圖

功成不受富貴汙輕舟扁然下五湖至今風流在姑蘇
我復見此雲壑圖兩坡喬木樛相扶殘山剩水千里餘
天際未知何有無一葦橫絕雙風蒲楊花春岸秋蓴鱸
在在著此儒仙臞世無宗師貌不如誰其嗣之吾大夫
詠梅分韻得藥字

惜樹須惜枝看花須看藥枯瘦發纖穠況此具衆美千

林墮黃埃數點昭青泚誰知霜雪深天意欲玉女

送蕃叟弟赴江西帥幕分韻得獨字

生平未省友松竹愛言從宦輸幽獨子也諸侯老賓客
襤被僅緣升斗祿為問江神何世情霽月光風送帆幅
天意元來向事功謹毋遐心自金玉

鼓琴行送許深父同知被詔赴闕

并序

迺季秋朔旦上御祥琴公亦始免喪蓋五日而趣
召至揆路虛左以待公者三年矣盛事盛事初某識

高宗所賞之琴僧於西湖晚入太學高宗晏居殊宮
而僧亦希得進見數與之游歸琴一張寶之有年今
覩盛事而不敢愛持以贈別故作是詩以道其所從
來因禱以為辭焉

伯牙非不善鼓琴指下能寫山高而水深亦有師曠號
精絕蜚雪白晝為重陰吾琴不以與二子二子不過衰
季愁嘆而悲吟后夔安在九竊遠南風不競鳳鳥瘖恭
惟高宗復古殿得此淨洗禁昧朱離任一鼓朝綱日井

井再鼓邊柝秋沉沉桑麻萬里皆按堵笙歌三紀無沾
襟橋山遺此歲月侵何時雅頌得所齋不僭寶藏豈愛
五重玉市價敢論雙南金公歸舊隱三霜砧天子恭默
思商霖君臣祥琴適相際使者十輩來駸駸白麻已草
弄印久端揆虛左誰當今我抱此琴病山林不如送公
西歸調金鰲但願為作南風音上以對揚高宗中興之
大業下以追還虞舜萬國之歡心

送徐一之客贛上兼簡贛守薛象先

清冰一段出萬壑越玉五重陳兩廂美人去作諸侯客

幾年過澗籌行藏

一之自號所居曰過澗

繫舟夷猶暮春堂細雨

冥冥烟樹蒼竹萌梅實盡此觴別恨豈但山川長章貢
分流合江水西風為我送雙鯉休言相憶強加餐報道
吳帆何日起

止齋集卷四